

Na osnovu člana 36. i 37. Zakona o budžetima u Federaciji Bosne i Hercegovine ("Službene novine FBiH", broj: 102/13, 9/14, 13/14, 8/15, 91/15 i 102/15) i člana 14. Statuta Općine Tešanj ("Službeni glasnik Općine Tešanj" broj:11/07) Općinsko vijeće Tešanj na svojoj 3. sjednici održanoj dana 29.12.2016. godine, donijelo je

ODLUKU O IZVRŠAVANJU BUDŽETA OPĆINE TEŠANJ ZA 2017. GODINU

I - OPĆE ODREDBE

Član 1.

Ovom Odlukom se uređuje način izvršavanja Budžeta Općine Tešanj za 2017. godinu (u daljem tekstu: Budžet), upravljanje prihodima i izdacima Budžeta, zaduživanju i davanju garancija iz Budžeta, te prava i obaveze korisnika.

Član 2.

Budžet se sastoji od bilansa prihoda, primitaka i finansiranja te rashoda, izdataka i povrata kreditnih sredstava i garancija, sa rasporedom rashoda i izdataka po budžetskim korisnicima.

II - TRANSPARENTNOST I JAVNOST BUDŽETA

Član 3.

Budžet je iskazan po funkcionalnoj, finansijskoj, organizacionoj i ekonomskoj klasifikaciji (po kategorijama, podkategorijama i stavkama).

Budžet Općine Tešanj i izvještaji o izvršenju Budžeta za 2017. godinu će se objaviti u „Službenom glasniku Općine Tešanj“ i na zvaničnoj internet stranici Općine.

III – RAČUNOVODSTVO I KONTROLA BUDŽETA

Član 4.

Odgovorna osoba za izvršenje Budžeta u cjelini je Općinski načelnik, a ovlaštene osobe navedene u ovoj Odluci i drugim aktima (pomoćnici Općinskog načelnika i nosioci aktivnosti - programa) su pomoćni izvršioци i odgovorni su za namjensku upotrebu sredstava Budžeta.

Nadzor nad zakonitošću transakcija i računovodstvenih dokumenata prihoda i izdataka Budžeta vrši Službenik za računovodstvo u Službi za finansije, privredu, komunalne i inspekcije poslove.

Služba za finansije, privredu, komunalne i inspekcije poslove je obavezna podnositi izvještaj o izvršavanju Budžeta Općinskom načelniku, a Općinski načelnik Općinskom vijeću.

IV - IZVRŠAVANJE BUDŽETA

Član 5.

Sredstva Budžeta osiguravaju se budžetskim korisnicima koji su navedeni u posebnom dijelu Budžeta sa utvrđenim pojedinačnim pozicijama.

Korisnici budžeta koriste budžetska sredstva samo za namjene koje su određene Budžetom i to do visine utvrđene na pojedinačnim pozicijama.

Član 6.

Služba za finansije, privredu, komunalne i inspekcije poslove vrši alokaciju sredstava po općinskim službama, koje su potom odgovorne za njihov namjenski utrošak. Budžet se realizuje putem odobrenih operativnih budžeta koji se formiraju prema dinamici realizacije odobrenih aktivnosti i planu novčanih tokova kojim se obuhvataju sve uplate i isplate sa jedinstvenog računa Općine.

Korisnici budžeta koriste budžetska sredstva u skladu sa operativnim planom i odobrenim programima, uzimajući u obzir utvrđenu dinamiku priliva i odliva sredstava.

Nadzor nad raspoloživim sredstvima za plaćanje u skladu sa uputama Općinskog načelnika i Budžetom vrši Službenik za finansije u Službi za finansije, privredu, komunalne i inspekcije poslove.

O utrošenim sredstvima korisnici izvještavaju Odjeljenje za finansije i resorne općinske službe.

Služba za finansije, privredu, komunalne i inspekcije poslove prati izvršenje operativnih budžeta i vrši izradu periodičnih i godišnjeg izvještaja. U slučaju umanjenja prihoda ili značajnijih promjena na strani rashoda Služba predlaže privremene obustave od izvršenja pojedinih rashoda, te ukoliko je to neophodno izmjene i dopune budžeta koje se donose po utvrđenoj budžetskoj proceduri.

Član 7.

Postupak nabavke roba, investicijskih dobara, ustupanja radova i vršenje usluga mora se obavljati u skladu sa važećim propisima o javnim nabavkama, za što je u ime Općinskog načelnika odgovoran Službenik za javne nabavke i nosilac aktivnosti. Realizacija nabavki će se vršiti u skladu sa planom javnih nabavki koji će se objaviti na zvaničnoj internet stranici Općine.

Član 8.

Općinski načelnik, na prijedlog Službe za finansije, privredu, komunalne i inspeksijske poslove, može vršiti preraspodjelu sredstava između pojedinih korisnika radi finansiranja nedovoljno predviđenih rashoda i izdatka. To prestrukturiranje može iznositi maksimalno 10% planiranih sredstava korisnika.

Služba za finansije, privredu, komunalne i inspeksijske poslove može, na zahtjev budžetskog korisnika, vršiti prestrukturiranje (preraspodjelu) sredstava unutar stavki rashoda odobrenih za pojedinog korisnika - organa uprave. Ukupno prestrukturiranje može se vršiti do 10% sredstava predviđenih za korisnika - organ uprave.

Više ostvareni prihodi i primici koji se ne utroše u tekućoj godini prenose se u cijelosti i predstavljaju prihod Budžeta za narednu godinu. Neutrošena sredstva u okviru planiranog nivoa budžeta, takođe, se prenose u cijelosti, a koriste se prvenstveno za realizaciju planiranih i ugovorenih a ne realizovanih aktivnosti u tekućem Budžetu.

Član 9.

Budžet će se izvršavati po slijedećim prioritetima:

- povrat sredstava finansiranja,
- transferi za jednokratne novčane pomoći,
- plaće i naknade vijećnika i zaposlenika,
- izdaci za materijal, energiju i usluge,
- transferi mjesnim zajednicama,
- tekući transferi i kapitalna ulaganja,
- ostalo.

Član 10.

O korištenju sredstava Operativne budžetske rezerve odlučuje Općinski načelnik na prijedlog Službe za finansije, privredu, komunalne i inspeksijske poslove. Služba za finansije, privredu, komunalne i inspeksijske poslove prijedloge za dodjelu sredstava operativne budžetske rezerve sačinjava isključivo po zahtjevima

budžetskih korisnika (resorne službe i drugi korisnici iz Općinskog registra) koje su dužne iste obrazložiti u okviru obrasca zahtjeva za korištenje operativne budžetske rezerve.

Općinski načelnik je obavezan polugodišnje izvještavati Općinsko vijeće o raspolaganju - utrošku sredstava rezerve.

Član 11.

Ako se tokom godine, na osnovu zakona i drugih propisa, poveća djelokrug ili nadležnost korisnika što zahtijeva i povećana sredstva ili se osnuje novi korisnik, sredstva za njegove troškove osiguravaju se iz Operativne budžetske rezerve, a odobrava ih Općinski načelnik.

Ako se tokom godine, na osnovu zakona i drugog propisa, umani djelokrug ili nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove izdatke prenose se na korisnika koji preuzme njegove poslove uz odobrenje Općinskog načelnika.

Član 12.

Prikupljanje javnih prihoda i obavljanje platnih transakcija vrši se preko jedinstvenog računa Općine i blagajne Budžeta Općine.

Potpisnici naloga platnih transakcija putem računa iz stava 1. ovog člana su lica koja ovlašćuje Općinski načelnik.

Član 13.

Pogrešno ili više uplaćeni prihodi u Budžet, vraćaju se uplatiocima na teret tih prihoda ili stavke rashoda "Povrat poreza, izvršenja po presudama, prinudna izvršenja i sporazumna rješenja" ukoliko su isti uplaćeni u prethodnim godinama.

Rješenje o tome donosi Služba za finansije, privredu, komunalne i inspeksijske poslove po ovlaštenju Općinskog načelnika.

Član 14.

Sredstva na pozicijama "Sredstva za deminiranje i trajno obilježavanje minskih polja" i "Program zaštite od prirodnih nesreća (obuka, rad Štaba CZ, izrada Plana zaštite i dr.)" realizovat će se na osnovu planova koje će sačiniti Služba civilne zaštite, odnosno općinski koordinator za deminiranje, a odobriti Štab civilne zaštite, odnosno Općinski načelnik.

Sredstva na poziciji "Ostale komunalne usluge" realizuju se kroz Program komunalne higijene za 2017. godinu.

Sredstva na pozicijama "Ostale komunalne usluge - sanacija javne rasvjete i svjetlećih znakova", "Održavanje autobuskih stajališta, dječijih igrališta, oglasnih tabli, zaštitnih ograda i spomen obilježja", "Zimsko održavanje puteva prema usvojenom Programu (mreža lokalnih puteva Općine)", "Održavanje i sanacija makadamskih puteva, propusta i priključaka", "Održavanje asfaltnih puteva i ulica, horizontalne i vertikalne signalizacije" i "Uređenje taksi stajališta iz namjenskih sredstava" realizovat će se na osnovu programa i planova koje će sačiniti Služba za finansije, privredu, komunalne i inspeksijske poslove, a odobriti Općinski načelnik.

Sredstva na poziciji "Zimsko održavanje puteva prema usvojenom Programu (mreža lokalnih puteva Općine) putem mjesnih zajednica prema pojedinačnim sporazumima" doznavaćat će se mjesnim zajednicama u skladu sa pojedinačnim sporazumima koji će za tu namjenu biti zaključeni.

Sredstva na poziciji "Podrška projektima prema usvojenoj Strategiji - tekuće aktivnosti" realizovat će se na osnovu plana aktivnosti i realizacije pojedinih ciljeva iz Strategije po odobrenju Općinskog načelnika.

Član 15.

Sredstva na poziciji "Grantovi mjesnim zajednicama za redovnu djelatnost" doznavaćaju se mjesnim zajednicama jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika. Raspodjela se vrši prema važećoj Odluci o načinu i kriterijima raspodjele sredstava za finansiranje rada organa mjesnih zajednica, a u izuzetnim slučajevima na osnovu pojedinačnih zahtjeva. Iz ove stavke se finansira rad jedinstvenog knjigovodstvenog servisa za potrebe mjesnih zajednica.

U slučajevima kada se vrši obustava sredstava za mjesne zajednice po bilo kom osnovu navedenom u članu 6. Odluke o načinu i kriterijima raspodjele sredstava za finansiranje rada organa mjesnih zajednica (Službeni glasnik Općine Tešanj", broj: 11/07 i 03/11), sredstva koja su tom prilikom obustavljena neće se retroaktivno isplaćivati mjesnoj zajednici, nego će se po otklanjanju nepravilnosti nastaviti finansiranje rada od narednog mjeseca.

Član 16.

Sredstva podgrupe "Grantovi socijalne zaštite i pomoći" u principu doznavaćaju se naznačenim korisnicima budžetskih sredstava (ustanove i udruženja) jednakim kvartalnim ili mjesečnim

dotacijama u zavisnosti od raspoloživosti budžetskih sredstava i specifičnosti samog korisnika. Služba za boračko-invalidsku zaštitu će posebnim aktom definisati bliži način transferisanja sredstava koja se izuzimaju od navedenog principa.

Sredstva za koja nisu naznačeni korisnici će se realizovati putem pojedinačnih zahtjeva, te prijedloga i programa koje, na prijedlog općinskih službi, odobrava Općinski načelnik.

Član 17.

Sredstva na stavci "Grant Centru za kulturu i obrazovanje Tešanj (redovna djelatnost i održavanje zgrade)" doznavaćaju se Ustanovi jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na stavkama "Grant Muzeju Tešanj" i "Grant Općoj biblioteci Tešanj" doznavaćaju se naznačenim korisnicima kvartalno ili po osnovu pojedinačnih zahtjeva.

Sredstva na pozicijama za koja nisu naznačeni direktni korisnici: "Grantovi osnovnim školama (tekuće potrebe)", "Grantovi srednjim školama (tekuće potrebe)" i "Grant predškolskim ustanovama - dječije igraonice" raspoređuju se prema pojedinačnim zahtjevima.

Sredstva na poziciji "Grantovi za projekte mladih i za mlade i podrška projektu Omladinska banka" raspoređuju se po prijedlogu raspodjele Službe za boračko-invalidsku zaštitu i opću upravu koji će biti sačinjen na osnovu kandidovanih programa udruženja građana, osnovnih i srednjih škola, i drugih ustanova, te mjesnih zajednica (izuzev učešća u projektu Omladinska banka) i na osnovu pojedinačnih zahtjeva.

Sredstva na pozicijama "Grantovi za obilježavanje jubileja, značajnih datuma Općine, kulturne i vjerske manifestacije i slično sa Programom obilježavanja tekovina odbrane 1992-95. godine" raspoređuju se na osnovu planova i programa koji će biti sačinjeni od strane Službe za društvene djelatnosti i investicije, Službe za boračko-invalidsku zaštitu i finansiranjem pojedinačnih projekata i zahtjeva.

Sredstva na poziciji "Studentske stipendije" raspoređuju se redovnim studentima kojima je, putem konkursa, dodijeljena općinska stipendija.

Sredstva na poziciji "Sredstva za stipendije studentima boračkih populacija iz sredstava Budžeta ZE-DO kantona" realizovat će se doznakama redovnim studentima kojima je, putem konkursa, dodijeljena kantonalna stipendija, odmah po doznaci sredstava iz Budžeta Kantona.

Sredstva na poziciji "Grant za angažovanje volontera u općinskim ustanovama" raspoređuju se u vidu refundacija dijela sredstava ustanovama koje su izvršile angažman volontera tokom godine, prema istim uslovima koji imaju volonteri u općinskoj administraciji.

Sredstva na poziciji "Grantovi ostalim organizacijama u oblasti kulture" raspoređuju se finansiranjem pojedinačnih projekata organizacija u oblasti kulture, a prema Odluci o kriterijima, načinu i postupku raspodjele sredstava nevladinim organizacijama.

Sredstva na poziciji "Grantovi za sufinansiranje ustanova kulture od općeg značaja i interesa za BiH" realizovat će se u skladu sa potpisanim Memorandumu o razumijevanju.

Sredstva za odobrene planove, programe, zahtjeve i prijedloge navedene u stavu 4., 5. i 9. ovog člana odobrava Općinski načelnik.

Član 18.

Sredstva na poziciji "Grantovi za rad sportskih klubova" raspoređuju se pojedinačnim klubovima i savezima prema Odluci o kriterijima, načinu i postupku raspodjele sredstava nevladinim organizacijama i u izuzetnim slučajevima na osnovu zahtjeva.

Sredstva na pozicijama "Grantovi klubovima i sportistima za izuzetne sportske rezultate", "Održavanje stadiona NK Pobjeda u Tešanjci" i "Grant za Sportski savez Općine Tešanj" će se realizovati na osnovu pojedinačnih programa i zahtjeva klubova, Saveza i Službe za društvene djelatnosti i investicije.

Sredstva na poziciji "Grant za Sportsko-rekreativni centar i za razvoj sporta" doznacavaju se Sportsko-rekreativnom centru Tešanj jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Član 19.

Sredstva na stavci "Grantovi za rad udruženja od posebnog značaja za općinu Tešanj" rasporedit će se posebnom odlukom Općinskog načelnika udruženjima koja su definisana Odlukom Općinskog vijeća.

Sredstva na poziciji "Grantovi ostalim udruženjima građana" raspoređuju se udruženjima građana koja nisu izdvojena kao prioriteta u okviru Budžeta, a prema Odluci o kriterijima, načinu i postupku raspodjele sredstava nevladinim organizacijama i po Javnom pozivu za kandidovanje projekata udruženja i fondacija koje će finansirati Općina Tešanj.

Član 20.

Sredstva na pozicijama "Grant Agenciji za razvoj za bruto plate i naknade" i "Grant Agenciji za razvoj za materijalne troškove" doznacavaju se jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na poziciji "Grant Agenciji za razvoj za podršku projektima" doznacavaju se Agenciji po pojedinačnim zahtjevima i programima aktivnosti.

Sredstva na poziciji "Grantovi klubovima vijećnika OV a" doznacavaju se klubovima prema važećoj Odluci Općinskog vijeća.

Sredstva na poziciji "Finansiranje Regionalne ekonomske zajednice Zenica i Saveza općina i gradova FBiH" doznacavaju se kvartalno po usaglašenim obračunima koje ove organizacije dostavljaju.

Sredstva na poziciji "Poticaj za razvoj zanatstva - obrta" doznacavaju se po provođenju odabira korisnika sredstava po upućenom javnom pozivu.

Sredstva na poziciji "Grantovi za razvoj poljoprivrede" raspoređuju se finansiranjem programa novčanih podsticaja za unapređenje poljoprivredne proizvodnje koji svojom odlukom usvaja Općinsko vijeće.

Sredstva na pozicijama "Sredstva podrške za zapošljavanje i samozapošljavanje boračkih populacija iz Budžeta ZE-DO kantona", "Sredstva podrške za zapošljavanje i samozapošljavanje marginaliziranih grupa" i "Podrška organizaciji Sajma privrede u Tešnju i drugim sajamskim aktivnostima" raspoređuju se na osnovu javnih poziva koji će biti raspisani od strane nadležnog Ministarstva i Općine Tešanj.

Član 21.

Stavke izdataka koje se finansiraju iz namjenskih sredstava viših nivoa vlasti, međunarodnih institucija i drugih izvora kao, na primjer, "Podrška projektima i utrošak sredstava kapitalnih grantova viših nivoa vlasti i drugih izvora" nisu limitirane i realizovat će se u zavisnosti od visine obezbijeđenih sredstava u vidu grantova - transfera viših nivoa vlasti, međunarodnih institucija i drugih izvora. Za dodatna doznacena sredstva bit će izvršeno uvećanje budžeta za tekuću godinu.

Sredstva utvrđena na pozicijama "Podrška projektima Evropske komisije i drugih institucija - općinsko učešće" i "Podrška projektima i utrošak sredstava kapitalnih grantova viših nivoa vlasti i drugih izvora" koristit će se za namjene podrške kapitalnim projektima (sufinansiranje) na području Općine u vidu učešća u realizaciji kandidovanih projekata kod donatora ili drugih nivoa vlasti, kao i za utrošak sredstava drugih nivoa vlasti i drugih izvora.

Sredstva utvrđena na poziciji "Gradnja 4 sportske dvorane osnovnih škola na teritoriji Tešnja" utrošit će se prema naknadno definisanom programu Službe za društvene djelatnosti i investicije.

Sredstva utvrđena na poziciji "Opremanje civilne zaštite, jedinica i službi iz sredstava posebne naknade" i "Opremanje vatrogasne jedinice iz sredstava Fonda za vatrogastvo i budžeta" koristit će se na osnovu planova koje će sačiniti Služba civilne zaštite i Štab civilne zaštite, a odobriti Općinski načelnik.

Sredstva utvrđena na poziciji "Utrošak sredstava od koncesija i naknade za korištenje šuma" raspoređuju se u skladu sa Odlukom Vlade ZE-DO kantona o načinu rasporeda i korištenja sredstava prikupljenih po osnovu kontinuirane naknade od koncesionara, te na osnovu važećih propisa o šumama. Ova sredstva će biti raspoređena na mikrolokacije definisane u okviru liste kapitalnih projekata za 2017. godinu.

Sredstva utvrđena na pozicijama "Projekt prikupljanja, odvodnje i prečišćavanja otpadnih voda na području općine Tešanj", "Sredstva za uređenje Starog grada – Gradine Tešanj (projektovanje i izvođenje radova)", "Izrada projektne dokumentacija za sanaciju postojeće deponije komunalnog otpada u Bukvi" i "Uređenje industrijskih zona (Bukva i Glinište)" utrošit će se u skladu sa definisanom namjenom.

Član 22.

Sredstva na stavkama "Realizacija ranije ugovorenih i prenesenih projekata iz prethodnih godina" predstavljaju već ranije odobrene i ugovorene projekte, a utrošit će se u skladu sa potpisanim ugovorima ili sporazumima iz prethodnih godina.

Sredstva na stavkama "Gradnja autobuskih stajališta, zaštitnih ograda i regulacija slivnih rešetki" i "Otkup preuzetog i ekspropisanog zemljišta" utrošit će se na osnovu planova koje će sačiniti nadležne općinske službe, a odobriti Općinski načelnik za potrebe gradnje uređaja za prečišćavanje otpadnih voda, saobraćajnice Glinište, raskrsnice Jelah i drugih infrastrukturnih projekata.

Sredstva na stavkci "Izrada studijsko-tehničke dokumentacije i druge potrebe projekata javno-privatnog partnerstva" će se realizovati na osnovu Plana potencijalnih projekata javno-privatnog partnerstva koji će usvojiti Općinsko vijeće.

Sredstva utvrđena na poziciji "Vodosnabdijevanje" utrošit će se na planirane projekte koji su podržani od strane lokalnih sredina, nadležnog kantonalnog Ministarstva i donatora.

Sredstva koja se odnose na kapitalna ulaganja u Organu uprave na stavkama "Nabavka opreme i objekata za

potrebe funkcionisanja Organa uprave", "Nabavka vozila" i "Informatička i druga oprema i nabavka softvera za Općinu" utrošit će se prema planovima resornih službi koje će odobriti Općinski načelnik.

Član 23.

Sredstva utvrđena na poziciji "Kapitalna ulaganja" i "Utrošak sredstava GSM licenci" raspoređuju se na osnovu posebne Liste u kojoj će taksativno biti navedeni kapitalni projekti za finansiranje iz Budžeta za 2017. godinu.

Visina sredstava koja se odnose na učešće mjesnih zajednica u kapitalnim projektima i njihov utrošak nisu limitirani planiranim iznosima u Budžetu. Za dodatna doznačena sredstva bit će izvršeno uvećanje Budžeta za tekuću godinu.

Sredstva utvrđena na pozicijama sa ekonomskim kodom 615311 bit će doznačena naznačenim korisnicima budžeta putem granta odmah po sticanju uslova za realizaciju kandidovanih projekata ili će se realizovati od strane nadležnih općinskih službi.

Član 24.

Odluka kojom se definišu kapitalna ulaganja i svi programi i planovi utroška sredstava navedeni u ovoj Odluci donijet će se u roku od 90 dana od dana usvajanja Budžeta.

Član 25.

Općinski načelnik će predložiti uravnoteženje Budžeta ako se u toku budžetske godine, zbog izvanrednih i nepredviđenih prilika i potreba, znatnije umanje prihodi ili uvećaju rashodi, a u skladu sa članom 57. Zakona o budžetima u FBiH.

V - ZADUŽENJE I GARANCIJE

Član 26.

Općina Tešanj će za 2017. godinu izvršiti povlačenje dijela kreditnih sredstava po Ugovoru sa Ministarstvom finansija Federacije BiH iz sredstava EIB-a, za potrebe realizacije projekta prikupljanja, odvodnje i prečišćavanja otpadnih voda na području općine Tešanj do visine od 3.500.000,00 KM.

Iz Budžeta Općine je odobrena garancija za kreditno zaduženje JP Toplana d.d. Tešanj u ukupnoj visini od 600.000,00 KM, čime se Budžet Općine za 2017. godinu opterećuje za rezervaciju u visini od 100.000,00 KM.

VI – FISKALNA ODGOVORNOST

Član 27.

Rukovodilac budžetskog korisnika (pomoćnik načelnika i drugi) je odgovoran za:

1. zakonito i namjensko korištenje sredstava i
2. efikasno i uspješno funkcioniranje sistema finansijskog upravljanja i kontrolu u okviru budžetom utvrđenih sredstava.

Rukovodilac je dužan svake godine za prethodnu budžetsku godinu, za period u kojem je obavljao poslove rukovodioca, popuniti izjavu o fiskalnoj odgovornosti.

Izjavu iz stava 2. ovog člana Rukovodilac dostavlja Službi za finansije, privredu, komunalne i inspeksijske poslove koje provjerava njen sadržaj.

Uz izjavu se prilažu i planovi otklanjanja slabosti i nepravilnosti utvrđenih od nadležnih organa, izvještaj o otklonjenim slabostima i nepravilnostima utvrđenim u prethodnoj godini i mišljenje internih revizora (interne kontrole) o sistemu finansijskog upravljanja i kontrola za oblasti koje su bile revidirane u prethodnoj godini.

VII - ZAVRŠNE ODREDBE

Član 28.

Ova Odluka stupa na snagu objavljivanjem u "Službenom glasniku Općine Tešanj", a primjenjivat će se na budžetsku 2017. godinu.

OPĆINA TEŠANJ
OPĆINSKO VIJEĆE

PREDSJEDAVALJUĆI VIJEĆA
Senad N. Subašić, s. r.

Broj: 01-02-1-2590-5/16

Datum: 30.12.2016. godine

Na osnovu člana 14. Statuta Općine Tešanj («Službeni glasnik Općine Tešanj» broj 11/07) i člana 40. Poslovnika o radu Općinskog vijeća Tešanj («Službeni glasnik Općine Tešanj» broj 7/08, 1/12, 7/12 i 10/14), Općinsko vijeće Tešanj na svojoj 3. sjednici održanoj dana 29.12.2016. godine donijelo je

PROGRAM RADA
OPĆINSKOG VIJEĆA TEŠANJ
ZA 2017. GODINU

I – UVOD

Program rada Općinskog vijeća Tešanj za 2017. godinu proizlazi iz prava, dužnosti i nadležnosti Vijeća, utvrđenim Ustavom, Zakonom i Statutom Općine, kao i aktivnosti koje proizlaze iz Programa rada, koji čini pitanja iz djelokruga Vijeća koja će se razmatrati na sjednicama Vijeća.

Program rada Vijeća svojim osnovnim sadržajem usmjeren je na određene teme koje se planiraju razmatrati na sjednicama Vijeća, kako u vidu normativno-pravnog regulisanja pitanja iz samoupravnog djelokruga Općine, tako i tematsko-izvještajnog djelokruga aktivnosti Vijeća.

Općinsko vijeće će, takođe, na osnovu prijedloga ovlaštenih predlagača, razmatrati i pitanja koja proističu iz podijeljene nadležnosti između Općine i viših nivoa vlasti.

II – SADRŽAJ PROGRAMA

Općinsko vijeće Tešanj će u 2017. godini razmatrati:

A) period januar – mart:

- > Prijedlog Odluke o izmjenama i dopunama RP "Jugozapad" Tešanj.
- > Prijedlog Odluke o usvajanju Programa novčanih podsticaja za unapređenje poljoprivredne proizvodnje na području općine Tešanj u 2017. godini,
- > Prijedlog Odluke o usvajanju Liste kapitalnih projekata za budžetsku 2017. godinu,
- > Prijedlog Odluke o visini prosječne konačne cijene m² stambenog prostora za 2016. godinu,
- > Izvještaj o radu Općinskog pravobranilaštva za 2016. godinu,
- > Izvještaj o radu Općinskog vijeća za 2016. godinu,
- > Izvještaj o realizaciji kapitalnih projekata za 2016. godinu,
- > Izvještaj Općinskog načelnika za period od 01.01. do 31.12.2016. godine,

- Informacija o stanju poljoprivrede i realizaciji općinskog poticaja na području općine Tešanj u 2016. godini,
- Informacija o izvršenom deminiranju, trajnom obilježavanju i uklanjanju NUS-a u 2016. godini na području općine Tešanj,
- Informacija o radu mjesnih zajednica za 2016. godinu,
- Informacija o radu nevladinih organizacija na području Tešanj za 2016. godinu,
- Informacija o stanju bezbjednosti na području općine Tešanj, i bezbjednosti učesnika u saobraćaju na području općine Tešanj za 2016. godinu,
- Informacija o realizaciji Strategije općine Tešanj,

B) period april – juni:

- Nacrt Odluke o izmjenama i dopunama RP "Poslovna zona Glinište",
- Prijedlog Odluke o izmjenama i dopunama RP "Poslovna zona Glinište",
- Izvještaj o izvršenju Budžeta za 2016. godinu,
- Izvještaj o izvršenju Budžeta za I (prvi) kvartal 2017. godine,
- Informacija o realizaciji projekta adresni registar
- Informacija o poslovanju javnih preduzeća na području općine Tešanj u 2016. godini (Izvještaji o poslovanju: JP Toplana, JP "Rad" i JP TRA),
- Informacija o radu i poslovanju javnih ustanova čiji je osnivač Općina Tešanj za 2016. godinu (Izvještaji o radu JU Opća Biblioteka, JU Centar za socijalni rad, JZU Apoteka "Tefarm", JZU Opća bolnica Tešanj, JU Centar za kulturu i obrazovanje, JZU Dom zdravlja "Izudin Mulabećirović Izo" Tešanj, JU Sportsko-rekreacioni centar Tešanj i JU Muzej Tešanj),
- Informacija o organizovanju i funkcioniranju sistema zaštite i spašavanja i zaštite od požara za 2016.godinu,
- Informacija o ostvarivanju prava pripadnika boračkih populacija putem Službe za boračko-invalidsku zaštitu,

- Informacija o zimskom održavanju lokalnih puteva na području općine Tešanj za sezonu 2016/2017. godina,

C) period juli – septembar:

- Nacrt Odluke o izmjenama i dopunama RP za naseljeno mjesto Tešanjka,
- Prijedlog Odluke o izmjeni i dopuni Poslovnika o radu Općinskog vijeća Tešanj,
- Prijedlog Odluke o donošenju Programa razvoja zaštite i spašavanja za period 2017.- 2021.godina.
- Izvještaj o izvršenju Budžeta za I polugodište 2017. godine,
- Izvještaj o radu Općinskog vijeća za period 01.01. – 30.06.2017.godine,
- Informacija o stanju bezbjednosti na području općine Tešanj za I polugodište 2017. godine i bezbjednosti učesnika u saobraćaju na području općine Tešanj,
- Informacija o radu Zavoda za zapošljavanje - Biro Tešanj za 2016.godinu,
- Informacija o radu Općinskog suda Tešanj za 2016.godinu
- Informacija o rješavanju statusa izbjeglih i raseljenih lica na području općine Tešanj,

D) period oktobar - decembar:

- Nacrt Budžeta Općine Tešanj za 2018. godinu,
- Budžet Općine Tešanj za 2018. godinu,
- Prijedlog Odluke o izvršavanju Budžeta za 2018. godinu,
- Izvještaj o izvršenju Budžeta za III (treći) kvartal 2017. godine,
- Prijedlog Odluke o izmjenama i dopunama RP za naseljeno mjesto Tešanjka,
- Prijedlog Programa rada Općinskog vijeća za 2018. godinu,
- Prijedlog Odluke o odobravanju finansijskih sredstava za dodjelu stipendija redovnim studentima za akademsku 2017/2018. godinu,
- Svečana sjednica Općinskog vijeća Tešanj povodom „10. decembra – Dan grada Tešnja“,
- Informacija o završetku školske 2016/2017. godine i upisu učenika u školsku 2017/2018.

godinu u osnovnim i srednjim školama na području općine Tešanj,

- Informacija o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama,
- Informacija - pomoć ženama u ruralnom području na prostoru općine Tešanj,
- Informacija o zakupu općinskih nekretnina i prometu zemljišta u kojem je Općina jedan od učesnika prometa

III

Zadaci utvrđeni Programom rada Općinskog vijeća su samo okvirni i određeni u minimumu.

Ovlašteni predlagači se ovim Programom ne ograničavaju, nego od njih Vijeće očekuje nove inicijative i prijedloge tokom 2017. godine, koji će se, po podnošenju na Vijeće, po proceduri propisanoj Poslovníkom o radu Vijeća, uvrštavati u dnevni red sjednica i voditi rasprava o istim.

Redovne sjednice Općinskog vijeća se održavaju, u principu, jednom mjesečno, a po potrebi i češće, dok se vanredne sjednice sazivaju prema ukazanim potrebama, s tim da dnevni red za sjednice Vijeća, u principu, ne bi trebao prelaziti 10 tačaka.

Predlagač i obrađivač materijala su obavezni pridržavati se rokova iz Programa prilikom izrade materijala iz svoje nadležnosti, te materijale blagovremeno dostavljati Stručnom odjelu Općine.

OPĆINA TEŠANJ OPĆINSKO VIJEĆE

PREDSJEDAVAJUĆI VIJEĆA
Senad N. Subašić, s. r.

Broj: 01-49-2-2432-2/16 2/16

Datum: 30.12.2016.godine

Na osnovu člana 7. Zakona o ministarskim, vladinim i drugim imenovanjima FBiH ("Službene novine FBiH", broj: 12/03, 34/03 i 65/13) i člana 14. Statuta Općine Tešanj («Službeni glasnik Općine Tešanj», broj: 11/07), Općinsko vijeće Tešanj na svojoj 3.sjednici održanoj 29.12.2016. godine, donosi

O D L U K U

o izmjenama i dopunama Odluke o utvrđivanju standarda i kriterija za imenovanja na upražnjene pozicije u reguliranim tijelima Općine Tešanj

Član 1.

U Odluci o utvrđivanju standarda i kriterija za imenovanja na upražnjene pozicije u reguliranim tijelima Općine Tešanj ("Službeni glasnik općine Tešanj", broj: 8/03, 1/04 i 10/06) u članu 8. dodaju se stavovi 4., 5. i 6. koji glase:

"Ovlašćuje se Općinski načelnik da u ime Općinskog vijeća Tešanj kao odgovornog javnog službenika, provede proceduru oglašavanja upražnjenih pozicija u reguliranim tijelima i imenovanje komisije za izbor.

Komisija za izbor je dužna putem pisane preporuke predložiti rang listu najboljih kandidata, Općinskom načelniku koji će u skladu s odredbama Zakona o ministarskim, vladinim i drugim imenovanjima FBiH, pripremiti odluku Općinskom vijeću Tešanj za imenovanje ili potvrđivanje liste najboljih kandidata.

Ovlašćuje se Općinski načelnik da u ime Općinskog vijeća Tešanj kandiduje punomoćnike koji će imati pravo učešća u radu i odlučivanju na skupštinama javnih preduzeća, kao predstavnike vlasnika kapitala."

Član 2.

U članu 10. stav 4. alineja 1. se briše.

Član 3.

Ova odluka stupa na snagu narednog dana od dana objave u "Službenom glasniku Općine Tešanj".

OPĆINA TEŠANJ OPĆINSKO VIJEĆE

PREDSJEDAVAJUĆI VIJEĆA
Senad N. Subašić, s. r.

Broj: 01-02-1-2596-2/16

Datum: 30.12.2016.godine

Na osnovu člana 14. Statuta općine Tešanj ("Službene glasnik Općine Tešanj", broj: 11/07), a u vezi sa članom 8. Alineja 8. i 9 i člana 13. alineja 5. Zakona o principima lokalne samouprave u Federacije Bosne i Hercegovine ("Službene novine FBiH", broj: 49/06), Općinsko vijeće Tešanj, na svojoj 3. redovnoj sjednici održanoj dana 29.12.2016.godine, d o n o s i

ODLUKU o davanju nekretnina na korištenje u Bukvi

Član 1.

Daje se saglasnost "MADI"-u d.o.o. Tešanj, da koristi zemljište, označeno kao k.p. broj:997/2 i k.p. broj:998/1 ukupne površine 5 614 m² upisano na Općinu Tešanj PL 1092 K.O. Novo Selo, bez naknade i bez promjene upisa na navedenim nekretninama, a radi zbrinjavanja animalnog otpada nastalog u radu firme.

Član 2.

Zemljište iz stava 1. ovog člana, daje se na korištenje na period do početka rada fabrike za preradu otpada animalnog porijekla čija je gradnja planirana u općini Kakanj, odnosno na period korištenja najkasnije do 31.12.2018.godine.

Član 3.

Predmetno zemljište iz stava 1. ovog člana, "MADI" d.o.o., treba koristiti i održavati na adekvatan način, sa što manje negativnih i štetnih uticaja na okolinu.

Član 4.

Sanitarni inspektor općine Tešanj će na predmetnoj lokaciji iz stava 1. ovog člana, kvartalno a po potrebi i češće, vršiti kontrolu praćenja procesa o načinu zbrinjavanja otpada.

Član 5.

Ova Odluka stupa na snagu narednog dana od dana objavljivanja u "Službenom glasniku općine Tešanj."

**OPĆINA TEŠANJ
OPĆINSKO VIJEĆE**

**PREDSJEDAVAJUĆI VIJEĆA
Senad N. Subašić, s. r.**

**Broj: 01-31-7-2543-6 /16
Datum: 30.12.2016.godine**

Na osnovu člana 363. Zakona o stvarnim pravima („Službene novine FBiH“, broj: 66/13 i 100/13) i člana 14. Statuta Općine Tešanj ("Službeni glasnik Općine Tešanj, broj: 11/07), Općinsko vijeće Tešanj, na svojoj 3.redovnoj sjednici održanoj dana 29.12.2016.godine, donosi

ODLUKU o odobravanju raspisivanja Javnog konkursa za prodaju nekretnine oznake k.p. broj: 5/32 u Poslovnoj zoni Bukva

Član 1.

Odobrava se raspisivanje Javnog konkursa i prodaja nekretnine u vlasništvu Općine Tešanj radi izgradnje objekta proizvodno poslovne namjene, koja se nalazi u Poslovnoj zoni Bukva i označena je kao - k.p.broj: 5/32 površine 3373 m² za K.O. Novo Selo.

Član 2.

Nekretnina iz Člana 1. ove Odluke nalazi se u obuhvatu Regulacionog plana "Poslovna zona Bukva" Tešanj ("Službeni glasnik Općine Tešanj", broj: 2/16).

Član 3.

Ovlašćuje se općinski Načelnik Općine Tešanj da objavi Javni konkurs, zaključi Ugovor i poduzme eventualno druge potrebne radnje vezano za prodaju nekretnine iz Člana 1. ove Odluke.

Član 4.

Nekretnina iz Člana 1. ove Odluke prodaje se uz uslov da se na istoj izgradi objekat proizvodno poslovne namjene najkasnije u roku od dvije godine od dana zaključivanja Ugovora o prodaji.

Član 5.

Procijenjena vrijednost nekretnine označene kao k.p. broj: 5/32 po 1 m² iznosi 28,50 KM.

Član 6.

Sve troškove u vezi prenosa prava na nekretnini iz Člana 1. ove Odluke, troškove zaključenja Ugovora, plaćanje poreza i troškove provođenja Ugovora snosi budući vlasnik nekretnine.

Član 7.

Ova odluka stupa na snagu narednog dana od dana objavljivanja u „Službenom glasniku Općine Tešanj“.

**OPĆINA TEŠANJ
OPĆINSKO VIJEĆE**

**PREDSJEDAVAJUĆI VIJEĆA
Senad N. Subašić, s. r.**

**Broj:01-31-7-1483-2/16
Datum: 30.12.2016.godine**

Na osnovu člana 363. Zakona o stvarnim pravima („Službene novine FBiH“, broj: 66/13 i 100/13) i člana 14. Statuta Općine Tešanj („Službeni glasnik Općine Tešanj, broj: 11/07), Općinsko vijeće Tešanj, na svojoj 3. redovnoj sjednici održanoj dana 29.12.2016., donosi

O D L U K U

o odobravanju raspisivanja Javnog konkursa za nekretninu oznake k.p. broj: 5/14 u Poslovnoj zoni Bukva

Član 1.

Odobrava se prodaja nekretnine u vlasništvu Općine Tešanj i raspisivanje Javnog konkursa za prodaju nekretnine u Poslovnoj zoni Bukva radi izgradnje objekta proizvodno poslovne namjene, koja je označena kao - k.p.broj: 5/14 površine 5121 m² za K.O. Novo Selo.

Član 2.

Nekretnina iz Člana 1. ove Odluke nalazi se u obuhvatu Regulacionog plana “Poslovna zona Bukva” Tešanj (“Službeni glasnik Općine Tešanj”, broj: 2/16).

Član 3.

Ovlašćuje se općinski Načelnik Općine Tešanj da objavi Javni konkurs, zaključi Ugovor o prodaji nekretnine i poduzme eventualno druge potrebne radnje vezano za prodaju nekretnine iz Člana 1. ove Odluke.

Član 4.

Nekretnina iz Člana 1. ove Odluke prodaje se uz uslov da se na istoj izgradi objekat proizvodno poslovne namjene najkasnije u roku od dvije godine od dana zaključenja Ugovora o prodaji.

Član 5.

Procijenjena vrijednost nekretnine označene kao k.p. broj: 5/14 po 1 m² iznosi 21,75KM.

Član 6.

Sve troškove u vezi prenosa prava na nekretnini iz Člana 1. ove Odluke, troškove zaključenja ugovora, plaćanje poreza i troškove provođenja Ugovora snosi budući vlasnik nekretnine.

Član 7.

Ova odluka stupa na snagu narednog dana od dana objavljivanja u „Službenom glasniku Općine Tešanj“.

OPĆINA TEŠANJ OPĆINSKO VIJEĆE

PREDSJEDAVALJUĆI VIJEĆA Senad N. Subašić, s. r.

Broj:01-31-7-1479-2/16

Datum: 30.12.2016.godine

Na osnovu člana 7. i 14. Statuta Općine Tešanj (“Službeni glasnik Općine Tešanj” broj 11/07), Općinsko vijeće Tešanj na svojoj 3.sjednici sjednici održanoj dana 29.12.2016.godine, donosi

ODLUKU

O GRBU I ZASTAVI OPĆINE TEŠANJ

I - OPĆE ODREDBE

Član 1.

Ovom Odlukom utvrđuju se izgled grba i zastave Općine Tešanj (u daljem tekstu: Općina), način i uvjeti upotrebe grba i zastave.

Član 2.

Grbom i zastavom Općine predstavlja se Općina i izražava pripadnost Općini.

II- IZGLED GRBA I ZASTAVE OPĆINE TEŠANJ

Član 3.

Grb je karakterističnog štitastog oblika sa gornjom blago zaobljenom stranom i donjim izduženim dijelom ovalne forme, koji se završava za grbove karakterističnom šiljku. Podloga unutar grba je žute boje. U gornjem dijelu grba nalazi se zelena površina sa obrisima Starog grada, Sahat-kule i munare. Predstavljani detalji simboliziraju kulturno naslijeđe općine Tešanj i vertikale koje vizuelno dominiraju uz Stari grad.

U donjem dijelu grba koji je zelene boje nalazi se knjiga bijele boje koja simbolizira znanje.

Dijelovi su spojeni žutom linijom koja simbolizira rijeku Usoru, Tešanjku i druge vodne resurse.

Okvir grba je crne boje.

Član 4.

Izgled i grafičko rješenje grba predviđeni su Grafičkom knjigom standarda Općine.

Član 5.

Zastava je pravougaonog oblika, bijele boje sa grbom Općine na sredini zastave.

Standardna veličina zastave je metar visine i dva metra dužine, a može se izrađivati u različitim veličinama, s tim što je odnos visine i dužine 1:2.

Veličina grba na standardnoj zastavi je 0,61 metar visine i 0,54 metar širine i može se mijenjati u zavisnosti od veličine zastave, s tim da veličina grba mora biti proporcionalna u odnosu na veličinu zastave. Ispod grba Općine na zastavi može biti ispisan natpis “Općina Tešanj”.

Zastava se može postavljati u horizontalnom i vertikalnom položaju zavisno od potrebe.

III – UPOTREBA GRBA I ZASTAVE

Član 6.

Grb Općine upotrebljava se u skladu sa odredbama ove Odluke, u svrhe i na način kojima se ističe ugled i dostojanstvo Općine, i to:

- na aktima, dopisima, elektronskoj i drugoj komunikaciji Općinskog vijeća, Općinskog načelnika, Općinskog pravobranilaštva, općinskih službi i drugih ovlaštenih lica koja istupaju u ime Općine;
- u službenim prostorijama Općinskog vijeća, Općinskog načelnika i Općinskog pravobranilaštva;
- na priznanjima i pečatima Općine i mjesnih zajednica;
- na informativnim i promotivnim materijalima Općine;
- u službenim prostorijama rukovodstva javnih ustanova i preduzeća kojima je osnivač Općina;
- u službenim prostorijama rukovodstva mjesnih zajednica;
- prilikom označavanja određene imovine Općine.

Član 7.

Zastava Općine ističe se:

- na zgradi ili ispred zgrade u kojoj je sjedište Općinskog vijeća, Općinskog načelnika i službi Općine, kao i općinskim uredima;
- u službenim prostorijama Općinskog vijeća, Općinskog načelnika i Općinskog pravobranilaštva;
- na zgradama ili ispred zgrada u kojima je sjedište mjesnih zajednica, javnih ustanova i preduzeća koje je osnovala Općina;
- na centralnom spomenobilježju;
- manifestacijama prijateljstva i saradnje, te na javnim priredbama na kojima se predstavlja Općina.

Član 8.

Zastava Općine može biti istaknuta:

- na zgradi u kojoj predstavnici Općine primaju službenu posjetu domaćih i stranih državnika ili se u njoj održava neka druga svečanost od značaja za Općinu;
- u svečanim prilikama na službenom vozilima Općine i stubovima javne rasvjete;
- u drugim prigodnim slučajevima kada to odredi Općinski načelnik.

Član 9.

U danima žalosti na prostoru Općine Tešanj zastava se ističe na pola koplja, odnosno jarbola ispred ili na zgradi Općine Tešanj, zgradi sjedišta javnih preduzeća i ustanova kojima je osnivač Općina, zgradi sjedišta mjesnih zajednica, drugim institucijama na području općine Tešanj, kao i na centralnom spomenobilježju. Odluku o proglašenju dana žalosti donosi Općinsko vijeće, Općinski načelnik ili drugi nadležni organ.

Član 10.

Grb i zastava Općine ne mogu se upotrebljavati na javnom mjestu ako su oštećeni ili na drugi način svojim izgledom narušavaju ugled Općine.

Oštećeni grb i zastava povlače se iz upotrebe.

Član 11.

Upotreba grba Općine može se odobriti javnim preduzećima i ustanovama, kao i drugim pravnim osobama (udruženjima građana, fondacijama i dr.), ako su njihovi poslovi ili djelatnost od posebnog društvenog interesa za Općinu.

Uz zahtjev kojim se traži odobrenje za upotrebu grba mora biti priložen tehnički opis upotrebe grba (skica), naznačena svrha njegove upotrebe, te dokumenti koji se odnose na rad i djelatnost pravne osobe.

U odobrenju iz prethodnog stava može se odrediti rok njegove važnosti i ograničiti upotreba grba u određene svrhe.

Odluku o upotrebi grba Općine donosi Općinski načelnik.

Član 12.

U provođenju projekata i održavanju događaja koje podržava ili finansira Općina, dozvoljeno je korištenje grba i naziva Općine Tešanj u promociji istih, a u skladu sa ovom Odlukom.

Slobodna je upotreba grba Općine u obrazovne svrhe, pod uslovom da ne narušava ugled i dostojanstvo Općine.

Član 13.

Zabranjeno je:

- modifikovati grb Općine i pojedine elemente grba, te takve upotrebljavati;
- grb Općine postavljati na podloge kojima se narušava ugled Općine;
- koristiti grb Općine u suprotnosti sa Grafičkom knjigom standarda.

Član 14.

Javne ustanove, preduzeća ili druge pravne osobe koje su upotrebljavale grb Općine do donošenja ove odluke, dužni su svoje radnje i postupke uskladiti sa ovom Odlukom, te podnijeti zahtjev za korištenje grba Općini, najkasnije u roku 6 (šest) mjeseci od dana primjene ove Odluke.

IV KAZNENE ODREDBE**Član 15.**

Novčanom kaznom u iznosu od 50,00 do 500,00 KM kaznit će se svaka institucija ili osoba koja prekrši odredbe ove Odluke.

Postupak za naknadu štete i postupak odgovornosti pokrenut će se protiv svake osobe koja namjerno ošteti grb ili zastavu ili ih javno izloži na bilo koji način koji je u suprotnosti sa ovom Odlukom i koji negativno utiče na dostojanstvo i ugled Općine.

Prekršaje i druge postupke može pokrenuti nadležna općinska inspekcija i Općinsko pravobranilaštvo Općine Tešanj.

V ZAVRŠNE ODREDBE**Član 16.**

Nadzor i kontrolu nad provođenjem ove odluke vrši Općinski načelnik i nadležne službe Općine.

Član 17.

Primjenom ove odluke prestaje primjena Odluke o grbu općine Tešanj (Službeni glasnik Općine Tešanj 2/97).

Ova odluka stupa na snagu danom objave u Službenom glasniku Općine Tešanj, a primjenjivat će se od 1.2.2017. godine.

**OPĆINA TEŠANJ
OPĆINSKO VIJEĆE**

PREDSJEDAVAJUĆI VIJEĆA

Senad N. Subašić, s. r.

Broj: 01-02-1-1509-3/16

Datum: 30.12.2016. godine

Grb Općine Tešanj



Na osnovu člana 14. Statuta Općine Tešanj («Službeni glasnik Općine Tešanj», broj: 11/07) i člana 21. i 22. Poslovnika o radu Općinskog vijeća Tešanj («Službeni glasnik Općine Tešanj», broj: 7/08, 1/12, 7/12 i 10/14), Općinsko vijeće Tešanj na svojoj 3. sjednici održanoj dana 29.12.2016. godine, donosi

RJEŠENJE**o imenovanju Komisije za izbor i imenovanje****I**

Imenuje se Komisija za izbor i imenovanje u sastavu:

1. Kurtić Amir, predsjednik
2. Jašić Haris, član
3. Alić Hajrudin, član
4. Hodžić Enes, član
5. Piro Amir, član
6. Solo Fahir, član
7. Jupić Mirano, član

II

Dužnost i obaveza Komisije je da prati provođenje zakonskih odredaba, pretresa sva pitanja u vezi sa izborom, imenovanjem i razrješenjem, kao i druga pitanja u vezi sa tim iz nadležnosti Vijeća, predlaže Vijeću izbor i razrješenje funkcionera i ostalih službenika koje Vijeće bira ili imenuje, vrši i druge poslove iz nadležnosti Vijeća u vezi sa izborom i imenovanjem.

III

Za rad komisija potrebno je prisustvo većine članova.

Svi stavovi, zaključci i prijedlozi komisije donose se natpolovičnom većinom glasova prisutnih članova.

IV

Ovo rješenje stupa na snagu danom objave u «Službenom glasniku Općine Tešanj».

**OPĆINA TEŠANJ
OPĆINSKO VIJEĆE**

PREDSJEDAVAJUĆI VIJEĆA

Senad N. Subašić, s. r.

Broj: 01-49-2-2431-3/16.

Datum: 30.12.2016. godine

Na osnovu člana 9. Pravilnika o postupku javnog konkursa za raspolaganje nekretninama u vlasništvu Federacije BiH, kantona, općina i gradova („Sl. novine FBiH“, broj: 17/14) i člana 14. Statuta općine Tešanj ("Službeni glasnik općine Tešanj", broj:11/07), Općinsko vijeće Tešanj, na 3.redovnoj sjednici održanoj dana 29.12.2016. godine, d o n o s i

RJEŠENJE

o imenovanju Komisije za provođenje javnog nadmetanja-licitacije u postupku prometa općinskim zemljištem

Član 1.

Komisija za provođenje javnog nadmetanja - licitacije u postupku prometa općinskim zemljištem (u daljem tekstu:Komisija), imenuje se na period do 31.12.2017.godine u sastavu, kako slijedi:

1. Mirsad Omić, predsjednik komisije
2. Muris Hrnjić, zamjenik predsjednika
3. Enes Hodžić, član
4. Mirano Jupić, zamjenik člana
5. Haris Jašić, član
6. Fahir Solo, zamjenik člana

Član 2.

Komisija ima zadatak da postupak nadmetanja-licitacije nekretnine provode u skladu sa odredbama Pravilnika o postupku javnog konkursa za raspolaganje nekretninama u vlasništvu Federacije BiH, kantona, općina i gradova („Sl. novine FBiH“, broj:17/14) i Javnog oglasa/konkursa o prodaji nekretnine za koje Općinsko vijeće donese Odluku o prodaji.

Član 3.

Komisija o postupku nadmetanja-licitacije vodi zapisnik u koji se unosi cijeli tok postupka i sve ponude stavljene od pojedinih učesnika, kao i stavljene prigovori.

Nakon okončanog postupka nadmetanja-licitacije, Komisija je obavezna svu dokumentaciju vezanu za provedeni postupak dostaviti Službi za katastar, urbanizam i imovinsko pravne poslove.

Član 4.

Komisija za provođenje nadmetanja-licitacije za svoj rad odgovara Općinskom vijeću.

Naknadu za rad članovima Komisije iz tačke I. ovog rješenja određuje općinski Načelnik na osnovu izvještaja o radu Komisije.

Član 5.

Administrativne poslove za Komisiju obavljaju uposleni na imovinsko-pravnim poslovima.

Član 6.

Ovo Rješenje stupa na snagu objavom u "Službenom glasniku općine Tešanj.

OPĆINA TEŠANJ OPĆINSKO VIJEĆE

PREDSJEDAVAJUĆI VIJEĆA Senad N. Subašić, s. r.

Broj: 01-31-8-211-106/16
Datum: 30.12.2016.godine

Općinsko vijeće Tešanj je na svojoj 3. sjednici održanoj 29.12.2016.godine, razmatrajući Prijedlog Programa rada Općinskog vijeća Tešanj za 2017.godinu na prijedlog vijećnice Alić Munevere, donijelo sljedeći

ZAKLJUČAK

Da se u Program rada Općinskog vijeća Tešanj za 2017.godinu u period oktobar-decembar uvrsti informacija - pomoc ženama u ruralnom poducju na prostoru općine Tešanj.

OPĆINA TEŠANJ OPĆINSKO VIJEĆE

PREDSJEDAVAJUĆI VIJEĆA Senad N. Subašić, s. r.

Broj: 01-49-2-2432-3/16
Datum: 30.12.2016.godine

Općinsko vijeće Tešanj je na svojoj 3. sjednici održanoj 29.12.2016.godine, razmatrajući Prijedlog Odluke o davanju nekretnina na korištenje u Bukvi, donijelo sljedeći

ZAKLJUČAK

Da Komisija za zaštitu okoliša Kolegiju Općinskog vijeća Tešanj, uz nadležne inspekcije minimalno jednom u tri mjeseca pripremi informaciju u pogledu načina odlaganja animalnog otpada i da redovno izvještava Općinsko vijeće o zatečenom stanju, odnosno da li se firma „Madi“ pridržava preuzetih obaveza i predviđenih propisa koji regulišu navedenu oblast.

**OPĆINA TEŠANJ
OPĆINSKO VIJEĆE**

**PREDSJEDAVAJUĆI VIJEĆA
Senad N. Subašić, s. r.**

**Broj: 01-31-7-2543-7/16
Datum:30.12.2016.godine**

Općinsko vijeće Tešanj je na svojoj 3. sjednici održanoj 29.12.2016.godine, razmatrajući Informaciju o rješavanju statusa izbjeglih i raseljenih lica na području općine Tešanj, donijelo sljedeći

ZAKLJUČAK

Prima se na znanje Informacija o rješavanju statusa izbjeglih i raseljenih lica na području općine Tešanj.

**OPĆINA TEŠANJ
OPĆINSKO VIJEĆE**

**PREDSJEDAVAJUĆI VIJEĆA
Senad N. Subašić, s. r.**

**Broj: 01-36-6-2551-2/16
Datum:30.12.2016.godine**

Općinsko vijeće Tešanj je na svojoj 3. sjednici održanoj 29.12.2016.godine, razmatrajući Informaciju o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama, donijelo sljedeći

ZAKLJUČAK

Prima se na znanje Informacija o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama

**OPĆINA TEŠANJ
OPĆINSKO VIJEĆE**

**PREDSJEDAVAJUĆI VIJEĆA
Senad N. Subašić, s. r.**

**Broj: 01-49-2-2574-2/16
Datum:30.12.2016.godine**

Na osnovu Odluke o pristupanju izradi Plana integriteta na lokalnom nivou broj: 02-02-1-2108-2/15 od 05.11.2015. godine te na osnovu člana 30. Statuta Općine Tešanj ("Službeni glasnik Općine Tešanj", broj: 11/07), Općinski načelnik donosi:

**O D L U K U
O USVAJANJU I PROVOĐENJU PLANA
INTEGRITETA U OPĆINI TEŠANJ**

Član 1.

Ovom odlukom usvaja se plan integriteta Općine Tešanj koji je pripremila Radne grupe za izradu plana integriteta.

Član 2.

Stupanjem na snagu ove odluke razrješavaju se dužnosti Koordinator i članovi Radne grupe za izradu plana integriteta (Odluka broj:02-02-1-2108-2/15 od 05.11.2015. godine).

Član 3.

(1) Za Koordinatora Plana integriteta imenuje se: Dedukić Mirnes, stručni savjetnik za ljudske resurse i normativno-pravne poslove.

(2) Koordinator integriteta je obavezan da u roku od 15 (petnaest) dana po usvajanju Plana integriteta pripremi sva rješenja o imenovanju timova/grupa koji će raditi na realizaciji Akcionog plana.

(3) Koordinator integriteta je zadužen za stalno praćenje provođenja plana integriteta, a posebno Akcionog plana, te davanje prijedloga za njegovo unaprjeđenje.

(4) Svi uposleni u Općini Tešanj dužni su obavijestiti Koordinatora integriteta o situaciji, pojavi ili radnji koje na osnovu razumnog uvjerenja mogu dovesti do narušavanja integriteta Općine.

(5) Svi uposleni u Općine treba da Koordinatoru integriteta, na njegov zahtjev dostave potrebne podatke i informacije od značaja za provođenje plana integriteta a koje nisu u suprotnosti sa važećim propisima.

(6) Najmanje dva puta godišnje Koordinator integriteta je dužan da podnese Izvještaj o provođenju plana integriteta načelniku Općine.

Član 4.

Ova odluka stupa na snagu danom donošenja.

**OPĆINA TEŠANJ
OPĆINSKO VIJEĆE**

OPĆINSKI NAČELNIK
Suad Huskić, s.r.

Broj: 02-02-1-2108-4/15
Datum: 08.12.2016. godine

Na osnovu člana 30. Statuta općine Tešanj (Službeni glasnik općine Tešanj" broj:11/07), Zakona o javnim nabavkama ("Službeni glasnik BiH" broj:39/14). u skladu sa Budžetom općine Tešanj za 2016.godinu a na zahtjev Službe civilne zaštite, Općinski Načelnik donosi:

O D L U K U
o izmjeni Plana nabavki općine Tešanj
za 2016.godinu

I

Na osnovu zahtjeva Službe Civilne zaštite Plan javnih nabavki za 2016.godinu mijenja se tako što se mijenjaju tačke 6. i 7. Plana javnih nabavki i to robe:

- tačka 6. (robe) Plana javnih nabavki "Nabavka vatrogasne opreme, opremanje službi i jedinica i operativnog centra", procjenjena vrijednost u Planu 148.700,00KM (bez PDV-a), ekonomski kod 821300, planirani postupak nabavke – Otvoreni: **mijenja se i glasi,**

- tačka 6. (robe) Plana javnih nabavki "Nabavka opreme za radio vezu i nabavka i ugradnja opreme za prepravku vatrogasne cisterne", procjenjena vrijednost u Planu 42.500,00KM (bez PDV-a), ekonomski kod 821300, planirani postupak nabavke – konkurentski zahtjev za dostavu ponuda uz podjelu na lotove.

- tačka 7. (robe) Plana javnih nabavki "Nabavka vatrogasne opreme iz fonda za vatrogastvo", procjenjena vrijednost u Planu 19.200,00KM (bez PDV-a), ekonomski kod 821300, planirani postupak nabavke – konkurentski zahtjev za dostavu ponuda; **mijenja se i glasi,**

- tačka 7. (robe) Plana javnih nabavki "Nabavka vatrogasne opreme iz fonda za vatrogastvo", procjenjena vrijednost u Planu 12.000,00KM (bez PDV-a), ekonomski kod 821300, planirani postupak nabavke – konkurentski zahtjev za dostavu ponuda;

II

Ova Odluka objavit će se na web stranici ugovornog organa i čini sastavni dio Plana Javnih nabavki.

III

Ova Odluka stupa na snagu danom donošenja i objavit će se u Službenom glasniku Općine Tešanj.

OPĆINA TEŠANJ
OPĆINSKO VIJEĆE

OPĆINSKI NAČELNIK
Suad Huskić, s.r.

Broj: 02-2-1-23-9/16
Datum: 23.11.2016.godine

Na osnovu člana 30. Statuta općine Tešanj (Službeni glasnik općine Tešanj" broj:11/07), Zakona o javnim nabavkama ("Službeni glasnik BiH" broj:39/14). u skladu sa Budžetom općine Tešanj za 2016.godinu a na zahtjev Službe za boračko-invalidsku zaštitu i opće poslove, Općinski Načelnik donosi:

O D L U K U
o izmjeni Plana nabavki općine Tešanj za
2016.godinu

I

Na osnovu zahtjeva Službe za boračko-invalidsku zaštitu i opće poslove Plan javnih nabavki za 2016.godinu mijenja se tako što se mijenja tačka 13. Plana javnih nabavki i to robe:

- tačka 13. (robe) Plana javnih nabavki "Nabavka kamera za video nadzor sa ugradnjom - II faza", procjenjena vrijednost u Planu 8.547,01KM (bez PDV-a), ekonomski kod 821300

, planirani postupak nabavke – Konkurentski zahtjev za dostavu ponuda; **mijenja se i glasi,**

- tačka 13. (robe) Plana javnih nabavki "Nabavka Tablet uređaja za Općinsko vijeće općine Tešanj", procjenjena vrijednost u Planu 10.256,00KM (bez PDV-a), ekonomski kod 821300, planirani postupak nabavke – Konkurentski zahtjev za dostavu ponuda.

II

Ova Odluka objavit će se na web stranici ugovornog organa i čini sastavni dio Plana Javnih nabavki.

III

Ova Odluka stupa na snagu danom donošenja i objavit će se u Službenom glasniku Općine Tešanj.

OPĆINA TEŠANJ
OPĆINSKO VIJEĆE

OPĆINSKI NAČELNIK
Suad Huskić, s.r.

Broj: 02-2-1-23-10/16
Datum: 27.12.2016.godine

SADRŽAJ

I - AKTI OPĆINSKOG VIJEĆA

	Strana
109. Budžet Općine Tešanj za 2017. godinu.....	110
110. Odluka o izvršavanju Budžeta za 2017. godinu.....	121
111. Program rada Općinskog vijeća Tešanj za 2017. godinu.....	126
112. Odluka o izmjenama i dopunama Odluke o utvrđivanju Standarda i kriterija za imenovanje na upražnjene pozicije u reguliranim tijelima općine Tešanj.....	128
113. Odluka o davanju nekretnina na korištenje u Bukvi.....	129
114. Odluka o odobravanju raspisivanja javnog konkursa za nekretnine oznake k.p. broj:5/32 u Poslovnoj zoni Bukva	129
115. Odluka o odobravanju raspisivanja javnog konkursa za nekretnine oznake k.p. broj:5/14 u Poslovnoj zoni Bukva	130
116. Odluka o grbu i zastavi Općine Tešanj.....	130
117. Rješenje o imenovanju Komisije za izbor i imenovanje.....	132
118. Rješenje o imenovanju Komisije za provođenje javnog nadmetanja-licitacije u postupku prometa općinskim zemljištem.....	133
119. Zaključak u vezi Program rada Općinskog vijeća Tešanj za 2017.godinu (prijedlog vijećnice Alić Munevere)	133
120. Zaključak u vezi Odluke o davanju nekretnina na korištenje u Bukvi.....	134
121. Zaključak o Informaciji o rješavanju statusa izbjeglih i raseljenih lica na području općine Tešanj.....	134
122. Zaključak o Informaciji o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama.....	134

II - AKTI OPĆINSKOG NAČELNIKA

39. Odluka o usvajanju i provođenju Plana integriteta u Općini Tešanj.....	134
40. Odluka o izmjeni Plana nabavki općine Tešanj za 2016.godinu.....	135
41. Odluka o izmjeni Plana nabavki općine Tešanj za 2016.godinu.....	135